

cursus nullus nubium, nulla frigoris, nulla ardoris asperitas, sed talis quaedam erit rerum temperies quam scient illi soli qui ea digni fuerint perfrui. Non enim senectus ibi, nec senectutis miseria, sed omne quicquid corruptionis est exulat, et gloria incorruptionis cuncta circumdat; verum super haec omnia est sociari consortiis angelorum et archangelorum omniumque caelestium supernarumque virtutum contuberniis perfrui, ultra omnem vero hanc et huiusmodi gloriam est et ipsius Domini Iesu Christi ineffabilis adipisci conspectus et maiestatis eius inenarrabili splendore radiari. Verum ne haec tibi subito ingesta obtutum mentis exterreant, paulatim te ad haec capienda provocabo. Intuere nunc caelum et inde extende paululum cogitationem tuam etiam super caelum, deinde considera totius creaturae transformationem. Non enim in ista qua nunc est qualitate persistet sed in aliam transformabitur splendidiorem multo et pulchriorem quanto si dici potest aurum plumbo splendidius. Haec enim futura beatus edocet Paulus cum dicit: « Quia et ipsa creatura liberabitur a servitute corruptionis. » Nunc enim tanquam corruptionis particeps multa patitur, quae pati necesse est corpora corruptibilia; tunc autem ubi omne quod fragilitatis est et corruptionis abiecerit, ineffabili pulcritudine decorabitur. Neque enim ultra corruptibilia corpora patietur sed incorruptibilia ea ex resurrectione recipiet. Unde et ipsa creatura in meliorem habitum transformabitur. Nulla erit tunc usquam discordia sed cuncta consona, cuncta convenientia. Omnium enim Sanctorum erit una concordia, nullus